

NGĀ UARATANGA

Anei e whai ake nei ngā uaratanga o te Taura Whiri i te Reo Māori hei whāinga māna ā ngā tau e tū mai nei.

Te Whāinga Whānui

Ko ngā ūaratanga o te Taura Whiri i te Reo Māori he whakatairanga, he whakaū i te reo Māori hei reo e kōrerotia ana i ngā wā katoa kia ora tonu ai, ā, kia rite ai tōna mana ki tō te reo Pākehā.

Te Whāinga 1

He whakatairanga i te reo Māori, he whakahau hoki i te iwi kia kōrerotia te reo, otirā, kia kaha ake te kōrerotia e te iwi Māori anō.

Te Whāinga 2

Katoa ngā whakahaere e whakawhiwhi ratonga ana ki te iwi whānui, me mātua whakawhiwhi i aua ratonga ki te reo Māori, ki te reo Pākehā i ngā wā katoa.

Te Whāinga 3

He whakawātea i ngā huarahi e taea ai te tā pukapuka tino pai e pā ana ki te reo Māori, tā pukapuka ki te reo Māori, tā pukapuka hei whakaipurangi whakaako.

Te Whāinga 4

Ki te whakanui ake i te hunga kua eke ki te taumata o te mahi whakapākeha, whakamāori.

Te Whāinga 5

Ki te whakatakoto kaupapa e whakatūria ai tētahi Whare Wānanga Reo Māori kia riro ki reira te mana whakangungu i te hunga whakaako i te reo Māori, ahakoa he aha te taumata, te hunga kaiwhakamāori, te hunga tuhituhi kōrero mō ngā nūpepa, te hunga pāho me ngā mahi katoa e whaiwāhi atu ana te reo Māori.

Te Whāinga 6

Ki te rangahau i ngā āhuatanga katoa o te reo Māori, ā, ki te pānui i ngā hua o aua rangahautanga.

HE POROPOROAKI

I te marama o Paenga-whāwhā ka pahure ake nei ka hinga mai a Hepi Biddle, te pāpā o tō mātou hēkeretari, o Miriama Kingi. I haere tā mātou kaumātua a Tā Matutaera Ihaka me ētahi o ngā kaimahi a te Taura Whiri ki te ūhunga i Rūātoki.

I taua wā anō ka hinga mai ko Hārata Hepetema o roto o Te Whanga-nui-a-Tara, ā, i tae anō te Taura Whiri ki tērā ūhunga.

Haere e ngā mate, okioki mai i roto i Te Ariki.

‘TE WAHAPŪ’

I ēnei rā kei te whakatūria tētahi kaupapa rorohiko hou e Richard Benton o te Wāhanga Kaupapa Māori o te Rūnanga o Aotearoa mō te Whakawā i te Mātauranga hei whakaahei i ngā akonga me ngā kaiwhakaako reo Māori ki te whakawhiwhiwhi whakaaro, kōrero hoki. Ko Te Wahapū te ingoa o tēnei kaupapa rorohiko.

Ka taea e koe ngā kōrero o roto i Te Wahapū te hopu mehemea he rorohiko tāu, he pouaka whakarerekē ngaru (modem) hoki me te pūmanawa (software) e tika ana, ā, ka taea hoki he kōrero te tuku atu ki Te Wahapū hei whakamōhio i ētahi atu akonga, kaiwhakaako rānei he aha āu mahi, he aha ōu whakaaro, he aha ōu raruraru. Mā te waea anō tāu rorohiko e hono ki Te Wahapū.

He aha ngā painga o Te Wahapū? Ko te tino painga ko te tere o te tuku atu me te tuku mai i ngā kōrero, anō nei he kōrero waea. Otirā, mā te patopato o ngā kōrero ki te rorohiko e taea ai e koe ēnei kōrero te pupuri hei pānui ā tōna wā.

Ki te pīrangitia e koe ētahi atu kōrero e pā ana ki Te Wahapū, me whakapā atu ki a:

Richard Benton

Te Wāhanga Kaupapa Māori

Te Rūnanga o Aotearoa mō te Whakawā i te Mātauranga (NZCER)

Te Whanga-nui-a-Tara

Waea: (04) 847-939

Waea whakaahua: (04) 847-933

INTERNET: bmaori@rs1.vuw.ac.nz

Ka kuhu tangata kāore āna whata-ā-pakapaka i ōna ringa ki tōna poho, tōna mutunga he whānako, tōna mate he whakamā. *He whakataukī*